

UNIVERZITET U SARAJEVU



**PRAVILNIK O IZBORU PROREKTORA
UNIVERZITETA U SARAJEVU**

Sarajevo, oktobar 2012.

U skladu sa članom 16. Okvirnog zakona o visokom obrazovanju Bosne i Hercegovine („Službeni glasnik BiH“, broj: 59/07), članom 126. Zakona o visokom obrazovanju, prečišćeni tekst („Službene novine Kantona Sarajevo“, broj: 22/10), a u vezi sa članom 128. Zakona o visokom obrazovanju Kantona Sarajevo, prečišćeni tekst („Službene novine Kantona Sarajevo“, broj: 22/10), Senat je na 1. sjednici održanoj 17. 10. 2012. godine,
d o n i o:

PRAVILNIK O IZBORU PROREKTORA UNIVERZITETA U SARAJEVU

I OPĆE ODREDBE

Član 1. (Sadržaj Pravilnika)

Ovim pravilnikom bliže se uređuju procedura i rokovi izbora, postupak prestanka funkcije i razrješenja prorektora Univerziteta u Sarajevu (u daljnjem tekstu: prorektor) u skladu sa Zakonom.

II IZBOR PROREKTORA

Član 2. (Tok postupka)

Postupak izbora prorektora podrazumijeva:

- predlaganje kandidata iz reda redovnih i vanrednih profesora Univerziteta od rektora Univerziteta;
- donošenje odluke Senata o izboru prorektora.

Član 3. (Pravo predlaganja kandidata)

Kandidata (kandidate) za prorektora predlaže rektor Univerziteta.
Prijedlog se dostavlja Senatu Univerziteta uz pisano obrazloženje i biografiju kandidata.

Član 4. (Izbor prorektora)

Senat odlučuje o prijedlogu rektora na sjednici koja se mora zakazati u roku ne dužem od petnaest dana (15) od dana dostave prijedloga rektora.
Senat o izboru prorektora odlučuje na sjednici javnim/tajnim glasanjem.
Za usvajanje prijedloga rektora potrebna je većina glasova ukupnog broja članova Senata.
Senat ovlašćuje rektora da potpiše rješenje o imenovanju prorektora.
Mandat prorektora prati mandat rektora koji ih je predložio.

Član 5.
(Odluka Senata)

Smatra se da je izbor za prorektora okončan kada kandidat dobije većinu glasova ukupnog broja članova Senata.

III PRESTANAK FUNKCIJE I RAZRJEŠENJE PROREKTORA

Član 6.
(Prestanak mandata prorektora)

Razlozi za prestanak mandata prorektora su: istek mandata, ostavka, prijevremeno razrješenje, izbor na neku drugu funkciju nespojivu sa funkcijom prorektora, osuda na bezuvjetnu kaznu zatvora.

Razlozi za prestanak mandata nastupaju zbog:

- isteka mandata – istekom mandatnog perioda;
- ostavke – podnošenjem ostavke;
- prijevremenog razrješenja – izglasavanjem odluke Senata o razrješenju;
- bezuvjetne kazne zatvora – dostavljanjem pravosnažne presude.

Član 7.
(Inicijativa za razrješenje prorektora)

Inicijativu za prijevremeno razrješenje prorektora Senatu mogu podnijeti:

- rektor;
- najmanje jedna trećina članova Upravnog odbora;
- najmanje jedna trećina članova Senata;
- najmanje tri nastavno-naučna/nastavno-umjetnička vijeća članica Univerziteta.

Inicijativa sa prijedlogom za razrješenje sa obrazloženjem može se podnijeti ako izabrani prorektor:

- ne izvršava zadatke predviđene zakonom i statutom ili ih izvršava protivno njima;
- prekorači ovlaštenja i time nanese štetu Univerzitetu u većem obimu;
- odsutan ili spriječen da obavlja dužnost u neprekidnom roku od tri (3) mjeseca;
- svojim ponašanjem naruši i povrijedi ugled funkcije prorektora;
- pravosnažno osuđen za krivično djelo.

Član 8.
(Postupak razrješenja)

Po dobijanju inicijative za razrješenje prorektora rektor je dužan sazvati sjednicu Senata najkasnije petnaest (15) dana od dana prijema inicijative.

O prijedlogu za prijevremeno razrješenje prorektora Senat odlučuje tajnim glasanjem i za usvajanje istog potrebna je većina od ukupnog broja članova Senata.

Ako Senat prihvati prijedlog za razrješenje, rektor na istoj sjednici predlaže novog kandidata za prorektora, prema proceduri predviđenoj u članu 4. ovog pravilnika.

Član 9.
(Odbijanje inicijative)


U slučaju da Senat odbije inicijativu za razrješenje prorektora, nova inicijativa se ne može podnijeti prije isteka roka od šest (6) mjeseci od podnošenja prethodne.

Član 10.
(Stupanje na snagu)

Ovaj pravilnik stupa na snagu danom donošenja i objavit će se na web stranici Univerziteta u Sarajevu i u Biltenu Univerziteta u Sarajevu.

SENAT UNIVERZITETA U SARAJEVU
PREDSJEDAVAJUĆI SENATA

REKTOR


Prof. dr. Muharem Avdispahić



0107-34-613 / 12

18.10.12